

國

朝

列

卿

紀

國朝列卿紀卷之十一

內閣行實

李賢字原德河南南陽府鄧州人生而氣宇凝

得疾劇葉夫人危之有老嫗來視曰此非凡子也幸毋以爲憂
言已卽去明日疾愈人以爲神七歲知向學稍長入爲州學生
學業騰起一時師友皆莫敢與齒舉宣德壬子河南鄉試第一
方宴鹿鳴有鶴數十旋繞廳上布政使李昌祺舉酒酬曰將必
有名世之才乎癸丑舉進士奉 命察山西河津蝗災時學士
薛公瑄以御史家居賢往造之叩質所疑薛公亟稱之以爲英
悟淳確非流輩可及 英宗皇帝嗣統賢上疏言帝王之道在

赤子黎民禽獸夷狄雖聖人一視同仁其施也必由親及疎未
有赤子不得其所而先養禽獸者今京師韃官不下萬餘以
俸言之指揮使三十五石而實支一石韃官則實支十七石五
斗是韃官一員當京官十七員半矣傳曰朝無倖位則食之者
寡此豈倖位之比况夷狄人面獸心一旦有警其勢必不自安
前代五胡之亂可不鑒哉乞斷自宸衷爲萬世計 勅兵部
漸次出之於外不惟省 國家萬萬無益之費亦可以消未萌
之患蓋賢筮仕卽有志當世如此雖議者難之而已臣之變畿
內韃官羣起扇亂亦應虜賢言始驗正統丙辰授吏部驗封主
事會有 旨文武誥勅三年不得請必候九年者賢以職守所

在復上言此獎勵臣下之良法若候九年則得者恒少不得者恒多廉貪不分勸懲不立乞仍舊便後卒從賢言賢以人才繫大學而太學因元之陋上疏言 國家建都北京以來所廢弛者莫甚於太學所創新者莫多於佛寺舉措如是可謂舛矣若重修太學雖極壯麗不過一佛寺之費請及時修舉以致養賢及民之効後數年詔新大學實自賢發之乙丑陞考功郎中踰兩月丁母葉夫人憂久之轉文選郎中候終制赴京賢官吏部更三任率公暇手不釋卷尚書王文端公直以公輔期之而少師楊文貞公每以不識賢爲歉南陽知府陳正倫文貞友也因要賢往見之賢不肯曰無一面之雅而造門是求知也士大夫

兩賢之已巳秋虜寇大同時中官王振用事力主親征吏部侍郎當扈從以疾告賢代之行師潰於土木英宗北狩扈從官多預其難賢瀕死而還景泰初年上正本十策曰勤聖學顧箴警戒嗜慾絕玩好慎舉措崇節儉畏天變抑貴近振士風結民心大略言朝政闕遺有司利弊生民休戚中外進言已詳然有關於上之心者或略臣以爲陛下—身國家天下之本而心又—身之本也正其本萬事理惟陛下之心旣正則國家天下之事可以次第推行乞留中以時省覽詔付外給事中李侃等以災異上疏謂李賢忠信宜賜覽納乃復取奏入命翰林繕寫置左右焉辛未虜遣使求通好有詔絕之令廷臣共

議長策賢上言虜所以敢輕中國者恃其弓馬之強而已中國
長策惟有所謂戰車若衛青之武剛車者可以禦之而又存取
勝之道則火鎗是也用得其法行可以退敵驅之出境止可以
衛民使得耕作然此策固善又在將士者何如夫今之將士猶
古將士而朝廷於將帥特彰剖封之典於士卒頻加賞勞之
恩待之厚矣然不能一爲國家復讐雪耻此忠臣義士所以
扼腕而不能安寢也乞詔加獎諭仍飭中外將臣言采取而行
是歲冬以合廷薦陞兵部右侍郎壬申奉命察四川有司之
不職者癸酉還京轉戶部右侍郎賢以虜欲無已不宜終徇上
疏言北酋也先近殺其主併吞諸夷包藏禍心其志非小若只

聽其講和貢馬圖金帛之利蔑敬順之誠增數冒名曾無定約
竭生民之膏血供無厭之貪求醜類日見盛強中國日加罷敝
持此悠悠實非長慮惟 陛下奮仁者之勇勵總戎之臣惕然
於心不必自逸觀釁而動以挫長驅之勢振中國之威則夷狄
之心自懾方來之患自弭 詔下兵部少保于謙謂李賢言誠
爲正論請下其章以勵邊臣甲戌轉吏部右侍郎詔頒君鑑錄
於羣臣賢擇其中善可爲法者二十二君又詮其最切者數事
曰鑑古錄上之蓋深有意効忠於上爲孝友恭儉之事而力莫
能與 英宗復位一時輔臣多竄殛遂以人望召賢兼翰林院
學士入內閣典機務未幾進吏部尚書兼官如故左右欲以汪

后殉葬者 上問武功伯徐有貞及賢賢言景泰初汪后卽不得志况二女皆幼可憫臣愚以爲宜厚遇之 上憮然以賢言爲是山東奏民饑雖得內帑銀三萬而不足 上復召有貞及賢議有貞持不可曰散銀有弊無益饑者賢言天下之事未嘗無弊顧奉行何如耳散銀有弊而不貸是視民饑死而不拯也因噎廢食豈爲人上之理 上深以爲然命增銀四萬兩民賴全活甚衆時太監曹吉祥忠國公石亨以迎 上復辟爲已功竊弄威福 上漸不能堪乃密語有貞及賢宜協心輔朕賢自念遭遇不偶凡事一以至公處之吉祥與亨滋不悅亨率兵西征御史楊瑄劾吉祥與亨縱家人奪民田 上嘉其敢言命吏

部識其名將擢用之亨還與吉祥謀此必有貞及賢所使相與
愬於上言已有迎復功爲有貞賢等所傾將俾臣等無噍類
因伏地流涕不已乃諭旨言官劾賢等并下獄其日風雷雨
雹大作損殿宇公署瓦木甚異上知天怒在此亨等反言上
天亦怒賢等雖強解釋然不自安明日言於上釋之詔俱謫
外任賢得福建布政司右叅政將辭吏部尚書鹽山王翱是日
得專對語有間上曰李賢與有貞雖同事未嘗阿比王翱因
頓首力言賢淳謹可大用上領之卽日留爲吏部左侍郎踰
月承天門災詔復賢尚書學士賢上章懇辭不允二年戊寅
春賜玉帶以優寵之皇太子將出閣賢請擇學術端良之士

借輔導乃上劉詡等數人爲春坊官 上仍命賢總之日授書
正字於 文華殿時崇仁處士吳與弼以薦至京 上喜其來
問賢曰與弼當授何官賢曰以弼之純儒必能成就君德授春
坊諭德專輔 青宮爲宜與弼固辭恩命不受乞歸田里復請
徇其志以勵士節 上思建庶人幽大內六十年欲赦之左右
多以爲不可召問賢賢曰 陛下此一念 太祖在天之靈實
臨之堯舜存心不過如此 上意遂決遣中官衛送居之鳳陽
出入自便初石亨以文臣總軍務於邊使武臣不得逞因請罷
之居無何邊檄騷然 上悟其非命賢舉可任巡撫者蓋都御
史李秉芮釗白圭王宇陳昱皆賢所薦一時號稱得人尋命賢

督修大明一統志賢偶患足病不能造朝上遣御醫來視又數遣太監安寧以政務問賢旬日方愈入謝御史劉濬劾太傅安遠侯柳溥敗軍之罪上怒曰與賊遇安能保其無損且將校聞濬言豈不解體將遣人繫之賢曰耳目之任職所當言惟明主用其是舍其非而已不當見譴石亨等遂乘間譏賢以爲阿護文臣會上知賢已深譖卒不行而大悟賢言爲是濬得溥責已而溥還自陝西上曰溥爲主將畏縮致敗不罪之何以警衆諭言官廷劾之奪其太傅景泰間三年一度僧數萬及天順二年如期來集賢言於上曰此輩有損無益宜俟十年一度著爲令初上於便殿屏人謂賢曰吉祥好預國政則西

方奏事者必先造其門柰何賢曰自古人主權不可下移若

陛下每事自斷惟公道處之則彼漸不敢預而趨附之人亦自少

矣上曰朕意亦然會石亨敗家居其從子定遠侯彪謀出鎮

大同諷大同薦已上廉其詐并逮亨置於法因問賢迎復事

賢曰當時亦有要臣臣不敢從上怪問何也賢曰天位乃

陛下所固有若景泰不起羣臣表請復位名正言順何至以奪門

爲功奪之一字何以示後此輩實貪富貴非爲社稷計倘景泰

先覺亨等何足惜不審陛下何以自解幸而事成得以貪天

之功然天下人心所以歸向陛下者以正統十數年間凡事

減省與民休息所致今爲此輩損大半矣上竦然大悟詔

凡以迎駕奪門冒功陞者四千人悉褫職中外肅然益非賢忘身徇國不避仇怨莫敢發者前此榮祿公以封贈 恩誥 闕謝至是陞辭 上特賜寶鏤三千貫因顧謂賢曰先生已盡天倫之樂乎賢頓首曰臣父子所以有今日者皆 陛下之賜是冬賜甲第一區賢上章懇辭 上曰聞卿舊宅去朝頗遠特賜近居以便宣召所辭不允遷居之日 上及 皇太子皆有落成之賚賢以朝覲官黜陟之典往往虛應故事無以示懲勸言於 上罷不職者數百人旌異者十人賜宴禮部 上命賢與尚書鹽山王翱去之四年庚辰虜酋孛來寇大同守將失利遂深入鴈門烽火徹於京師民驚遁不可止賢請急發兵遣兩都

督將之出鴈門倒馬二關旬日始定五年辛巳虜西寇涼州莊浪賢知上以虜入爲憂陳邊事五條上從之遣懷寧伯孫鏜率兵往禦時江南北大水而加以師旅賢言宜布寬恤之典遂罷天下所取花木板枋之類及暫免采柴追馬清匠刷卷諸事而采柴一歲省銀三十餘萬兩吉祥從子昭武伯欽殺人事覺御史劾之上雖見原而下詔戒諭勲舊之臣欽益懼與吉祥養死士謀不軌欲幽上於南宮而立皇太子因西師行乘機入內爲亂朝臣當道或有憾者戕害之擊賢傷首及耳且持賢謂曰某等迫於讒間不得已爲此請入疏以申救賢曰爾旣殺仇償怨能止戈反正我當言之上得疏乃知賢在甚喜

既脫於難

上急召之入宮手疏曰逆賊就擒此非小變宜詔

天下一切不急之務悉皆停罷且言自古治朝未有不開言路

者惟權奸欲塞之以遂其非由是陷於大惡而不悟自石亨等

排黜臺臣言路閉塞其流遂至此極上悉報可下寬恤條而

以開言路殿焉上念賢忠勤下勅加太子少保賢上章懇

辭不允賢以西師未解而京師有變大軍不可輕出請復都御

史王竑俾與兵部侍郎白圭分道禦虜虜引去邊臣請罷兵而

議者懼有後警賢上言兵出在外可暫而不可久暫則爲壯久

則爲老且虜安能保其不來若慮其復來更無休息之期況人

民供輸疲困已極宜趁河開班師使民得屯種爲便上命廷

議率從賢言 聖烈慈壽皇太后崩 上見賢所服斬衰與衆
異取視之乃知賢服制合古卽以賢服著爲法命官中悉易之
孟冬享 太廟適大喪禮未終 上以問賢賢言宜俟釋服後
庶人情事理兩安 上曰微公言幾舛於禮七年癸未春 上
足疾不視朝召賢曰大祀將至而疾未愈欲遣官代行可乎賢
曰亦須至壇所雖不能行禮人心亦安 上至齋宮召賢曰朕
惟俯伏艱於起身欲令一人扶之何如賢曰 陛下能力疾行
禮尤見敬天之誠遂竣事而還二月晦夜賢聞空中有聲明日
密疏曰傳言無形有聲謂之鼓妖上不恤民而有此異惟 陛
下憫念黎元凡一切不便於民者悉皆停罷則災變可弭 上

覽之卽召賢曰此事正須先生言先生不言誰復言者其具寬恤事條密封以來賢遂疏十事一請清淹禁罪人二止銀場煎辦三停歲造紙劄四蠲被災糧稅五弛芻米之徵六罷虧損馬匹七飭邊臣撫恤兵民八命有司存恤流移九戒御史察貪吏十禁外官因事科歛上曰朕諦觀之皆實惠也宜卽詔天下賢又請罷江南所造段疋及燒磁器清錦衣衛所監罪人止各邊守臣進貢已下番所遣使臣停內外買辦採辦上不從賢執之數四止取前十條行之左右見力爭皆寒心同列亦爲賢懼賢曰古之大臣知無不言今雖不能盡然至於利害繫於安危者豈可默默以苟祿位然上聖明亦不以爲忤也上以

母后胡氏因疾請間尊號靜慈仙師非令典從上 皇后尊謚而
左右以爲不便一日召問賢賢曰 陛下此一念天地鬼神實
臨之然臣之愚必須陵寢享殿神主皆如奉先殿之式庶幾稱
陛下之明孝不然爲虛名 上卽舉行是時錦衣衛指揮門達有
寵於 上專理詔獄且兼緝事於中外国道洶洶相視以目賢
嘗以爲言達啣之會指揮袁彬爲其誣下獄有楊暄救之 上
命達逮訊達欲并傾賢林暄使誣賢爲草奏狀狀牽捕數十人
勢危甚上命廷鞫之其人遂吐實曰此達所教也賢以事白上
疏力辭且以知足不辱知止不殆爲言 上不允曰此細故無
用介意八年甲申春正月 上不豫久之疾劇命中官以遺詔

示賢十七日 上賓天後五日 憲宗嗣位有欲專致隆於

上生母者賢曰 天子新卽位四海顒望凡事宜悉遵遺詔庶幾

順天理服人心脫或不然則當尊母妃爲太后於 皇后爲

太后上加二字以別之卒如賢議尊 皇后爲慈懿皇太后貴

妃爲 皇太后尋進賢少保吏部尚書兼華蓋殿大學士未幾

門達以附中官謫遠方又爲言者劾其欺罔故殺諸罪謫成嶺

表不知者以謂出賢意其黨相與爲匿名文書指賢姓名欲中

之賢不自安懇乞退休 上不允下令禁議謗者時災異屢見

賢請出官人以昭 聖德又上疏言人君一身天下之主若行

事合宜中外順服不然則人背離德而欲天下治安不可得矣

然治安之本在於君德輔養君德又在左右前後皆老成端謹
之人若輕浮頑猾喜好生事逢迎取悅供耳目之玩信佛老之
教者望卽日退出毋令隨侍庶於君德無損臣受 朝廷祿位
爲宗社生民至計不敢不竭忠盡言惟 陛下剛斷而進退之
五月五日風雹大作飄瓦拔木 上及郊壇賢復疏言天戒顯
赫如此惟 陛下勉加修省雖在閒靜之中常如對越之際不
可一毫與左右狎亦不可聽其誘而寵用之惟日與老成之臣
商議君德何以修朝政何以舉念茲在茲頃刻不忘仍寫勅諭
羣臣同加修省庶回天意賢以疾在告 詔免早朝尋降勅命
知 經筵事及總修 英宗睿皇帝實錄成有司請造鹵簿已

得旨賢聞之亟入言先朝所造車駕尚有貯內庫未經御者
今恩詔方頒百姓甦息未久奈何復爲此上卽日寢其旨
皇后吳氏之廢小人乘機欲害賢者益甚上命錦衣衛嚴禁之
且遣衛士夜宿賢第護賢以行有內直將軍愬天順初因入直
迎駕而陞冒功者今一切褫職非法意上念其久於役特
復之而以迎駕奪門陞者紛然入愬不已賢言於上曰自石
亨輩此舉之後人以得富貴之易貪利者惟幸有事宜早治之
且請復故少保于謙等官賜祭改葬以雪幽枉上亟是賢言
命兵部按其以迎駕奪門陞者自太平侯張瑾興濟伯楊瑄以
下俱奪爵蓋賢欲消惡於夫前故於上卽位極言之出廷詞

洵者衰息有識者至今以爲難丙戌二月聞榮祿公之喪詔起復賜賻甚厚復賜素品備途中食用而令有司爲營葬事賢上疏言士見用於盛時者無分小大於父母喪皆得盡三年之制若臣以所任之事而不得盡恐無補於名教詔卿勿以私恩廢公義宜抑情遵命以成大孝賢復疏言陛下必欲起臣以爲國家事重不得以彼易此但今內外大臣當任者皆忠正老成之人使臣在此不過贊成其事無臣贊之亦不爲欠臣之去就甚輕昔富弼屢詔不起亦以朝廷有人不至甚不得已故也臣之蹤跡似亦類此乞容臣終制假使未與溝壑則驅策駑鈍以報一皇上固有日矣詔卿當深念職任之重移孝爲忠不

必固請遂遣太監林興輔行賢聞故鄉歲祔加以師旆請止官
管葬不從旣抵家襄事興卽日促賢上道五月至京師入見
上慰勞有加賢退卽疏言 陛下謂臣可以委託堅使奪情而不
知臣實駑鈍不堪有類折足之鼎且古之大臣若張九齡寇準
輩雖起復而人不非者良以其人之才足勝重任有益於天下
國家如臣不過尋常之流無事之時亦招物議今不獲命則不
知者謂臣心實以此爲榮姑陳奏章免人之議而已乞察臣至
情而矜從之 詔禮有經有權朕特從權制用卿若故違君命
豈得爲孝卿當深念大義勿恤微言勉起就任毋得再陳賢復
疏言臣累訴衷情而 陛下曲加勉諭終不矜允捧誦恩旨

涕泗交頤所以不能遵 聖訓者區區之心誠有所不忍况臣
日迫衰朽縱起供職未必能副 陛下盛意徒重臣之慚增臣
之罪 詔卿言之再三但委託尤重宜體至懷卽日就任慎勿
再言又遣中官至第道 上意乃供職賢因上道中往來所得
軍民利弊八事大約乞重守令之選毋拘常格以免墮政留河
南所運之粟以備民饑停通州諸衛薪炭之徵以蘇民困蠲江
南馬戶而復本處民戶代之以均勞役增天津諸衛及河南榮
澤新鄉諸處驛遞以便往來開衛學軍生歲貢以振淹滯 上
卽命所司議行是歲秋率廷臣言今天下盜賊未息災傷未止
仰惟 祖宗創業垂統官禁甚嚴內外不許混雜府庫充積金

銀不肯妄費遊宴有常所而不縱情賞賜有常規而不濫及至
於祖訓一書尤爲明備惟陛下逐一省覽刻意恭儉以繩
祖武以幸天下上方虛已以聽而賢感疾浹旬不愈上遣
中官臨問賜尚食及命御醫日夕診視報疾狀凡三閱月疾亟
語弟監察御史讓及子璋惟以國恩未報史事未成爲念以
是年十二月十四日卒於賜第享年五十有九贈太師謚文達
賢少卽有志聖賢之學爲諸生時督學者問所志對曰爲學之
道當如周子言蘊之爲德行行之爲事業其人大異之在吏曹
遍書箴銘於座右與學士薛瑄交厚善務以性學相切劘而窮
理之功益密故言益純學益克立朝四十年不立黨與惟守一

誠蓋不知者始或疑而終大服之無異議自以受知 英宗遂身任天下之重知無不言天下亦倚之爲重雖遭讒罹謗處之泰然登對之際氣象雍容言辭簡當將順匡正之力甚多 英宗嘗論景泰不與大臣接言賢曰自古明君未嘗一日不與大臣商確治道所以天下常安先儒謂接賢士大夫之時多親宦官宮妾之時少於君德方有益又言朕自復位以來未嘗一日忘在南城時每以此戒左右賢曰安樂不忘患難古昔聖賢之君存心正如此又以戒左右最善又言飲食隨分曾不揀擇衣服亦隨宜雖著布衣人不以爲非天子也賢曰如此節儉尤見盛德若朝廷節儉天下自然富庶前代如漢文帝唐太宗宋仁

宗皆節儉是以當時海內富庶非其餘可及又曰朕於四書皆嘗遍讀如二典三謨真是格言賢曰誠如 聖諭凡帝王修身齊家敬天勤民用人爲政之事皆在其中此時正宜玩味體而行之 英宗每爲首肯愛惜人才惟恐弗力而以獎恬退厲名節爲先耿公九疇及軒公輓皆以廉介聞首舉耿爲都御史軒爲刑部尚書未幾耿爲石亨所排斥軒以權貴侵官託疾去又屢言於 上而還之年公富亦爲亨姪彪所誣陷及亨敗力言富有執守可大用遂起爲戶部尚書 上嘗謂賢曰左右多不悅富者賢曰不悅衆見其賢禮部侍郎缺員禮部郎中李和求近習薦陞 上問賢何如對曰不知其人臣所知者學士李紹

可任此因進言邇者士風不立多夤緣以求進如若用紹請於
黼座召吏部面命之庶幾士類知警上從之命下之日傾朝
僂然其後任事大臣賢多所薦矣其人之不知之反有訾賢者或
以告賢賢曰吾知用其才耳三選庶吉士儲養於翰林親加督
教如愛子弟與學士呂文懿公原陳公文彭公時相處十餘年
未嘗失辭色每語具以忠言相告而於講學論政至終日忘倦
人有善若已出不白之不已兩廣兵興編修丘濬實廣人具嶺
南事宜告賢賢繳奏言可用請付軍中爲平賊之助遇天變民
瘼憂形於色每以裁抑浮費蘇息民力爲本謂內帑財物非濟
兵民則人主必生侈心而移之於土木禱祠聲色之用自賢柄

致前後發內帑銀救荒卹邊凡數十萬計人有急難以身救之而於植臺諫慎刑獄尤惓惓焉有會試被黜者訴考官有弊

上不悅以章示賢賢曰此乃私忿考官實無弊如臣弟讓亦不在中列可見其公 上意方解言路屢闕屢闢而不至於銷鑠皆

賢力主之惟成化初言者歷詆中官之惡謂不可使與國政得補外而或咎賢不申救者賢曰此事何可激也甘露之變黨錮之禍諸君獨不知之天順中宗室臨川王弋陽王前後爲緝事者發其陰事已而多涉虛因 召問賢賢曰觀此則其餘所枉多矣法司雖知其枉而不敢辯乞 明詔理官不許畏勢避嫌實傷和氣 上乃召三法司面加戒飭中外咸悅凡 朝廷大

政令涉於軍情邦計者必經賢議而後決虜酋孛來近邊有言傳國璽在其處石亨請發兵乘機掩取之上爲之動賢曰頻年災荒府庫空虛兵民困極宜與休息且虜近邊而未嘗犯塞無故伐之必賈釁况秦璽亡國之物亦不足寶上矍然罷之內府奏乏金用詔下戶部議請以蘇松嘉湖四府歲折糧銀折金五萬兩賢曰國家財賦仰給東南而金非其所產今欲折金價必湧貴聞雲南諸夷有歲辦金銀若以銀折金亦足以充國用松潘羗寇亂已勅三司調兵勦之久不下賢曰三司頗頗牽制自不能成功若朝廷命一大臣統之則事定矣易曰長子帥師弟子輿尸不可不慮上問可將者賢薦都督謝貴

遂用之而松潘寇始靖凡冊后妃與諸王大喪大祀婚冠之禮
及憲宗之初親耕視學諸大典禮悉命賢與禮官增損其儀
式而後行白金文綺上尊珍饌與夫四方貢獻內帑圖書賜賚
無虛月賢每以盈滿爲戒取小旻詩中語扁其堂曰臨深以寓
安不忘危之義雖位及三孤不治田宅不鬻女侍爲學務實踐
不爲空言因自號浣齋孝友敦睦之行有人所難能者所居圖
書左右口誦手錄雖老不懈每有得卽識之有體驗錄一卷雜
錄三卷所備顧問有天順目錄三卷作文章理爲主不爲艱深
靡麗之詞每教人以晦庵草廬爲法有古穰集若干卷詩冲澹
溫厚有和陶詩二卷和杜詩一卷讀易記一卷南陽李氏族譜

若干卷平居無疾言遽色其容粹然見者如在春風中浮躁者爲之自失陰狡者爲之中沮蓋其所稟者厚所養者深故其所得有大過人者如此論者謂自天順以來所以正君德恤民生進賢才廣言路抑佞幸却戎狄皆賢之力云

菽園雜記云羅修撰倫上疏論閣老南陽李公奪情事謫泉州市舶提舉章編修懋黃編修仲昭莊檢討梟皆上疏論元旦觀燈事章謫知臨武黃謫知湘潭莊謫桂陽州判官李公歿後淳安商公復入閣言於上皆得復其官於是羅爲南京翰林修撰章黃皆爲南京大理評事莊爲南京行人司副適廬陵陳公文亦卒士人有爲詩悼之者末二句云九原若見南陽李爲道

羅生已復官蓋章黃莊三人之謫實出 上意而羅之謫李公不能無意故云先是大臣遭父母喪奪情起復者比比皆是至是始著爲令皆終喪三年奪情起復者亦間有之實出 朝廷勉留非復前時之濫是則羅生一疏之力也

又云成化初給事中張寧等欲上疏乞起曹州李公秉爲兵部尚書河州王公竑掌都察院事恐左右或間之密以奏草示南陽李公且求調護公視其草哂之復正言曰薦人但當言其人可用若預擬某爲某官於事體得無礙乎寧深服之乃退而易草以進翌日御批出王爲兵部李掌院事後有問其故者文達云事在朝廷不可知也意者 上以王公度忠邪太明御置之

彼處恐或不靜而然耶人服其有識而慎又云文莊葉公巡撫
兩廣時素與丘內翰仲深不合丘每校間毀之庚辰進士廣西
張某嘗短葉於丘丘因爲先容進謁李文達言賊至城下葉猶
詠詩不輟且殺無辜之民爲功文達素知葉公默識而已蓋張
某歸省時葉嘗知其不檢疎之由是致怨丘素知文事非文達
所長且復護短乃謂葉笑其詩文不佳李公啣之他日錦衣呂
指揮貴湯都指揮胤績盛稱葉公學問文章之美且云置之內
閣於先生無忝文達憮然曰與中笑我乃爲入閣地耶入大藤
峽用兵勅韓公雍書有云往者葉某虛張捷報致賊猖獗蓋
張某先入之言至是始發也葉公後因言官之薦僅以右僉選

左僉而已文達沒後始得入禮部云

又云李文達公賢在內閣時太監曹吉祥嘗在左順門令人請說話文達語云 聖上宣召則來太監請不來也曹乃令二火者掖而至文達云太監誤矣此處乃天子顧問之地某等乃謹候顧問之官太監傳 聖上之命有事來說自合到此豈可令人來召耶曹云吾適病足耳先生幸恕罪也聞李公歿有事司禮監只令散本內官來說太監不至今日閣老請太監議事亦不至矣內閣體勢之輕又非前比

寓圃雜記云楊暄景和者北京人善彩漆亦智謀士也天順間錦衣指揮門達擅生殺之權多陷害人同時袁彬指揮者隨

英宗北狩有護蹕功爲達所間久在散地 憲宗初立達恐其逼已令邏卒發其陰私欲致之死地暄素不識彬因抱不平之氣爲彬訴屈遂奏達違法二十餘事奏入 上方與太監裴璫擊毬遽令達逮問暄至其解達陳諸淫刑恐暄神色不變佯若無所與者達歷詢其事皆曰不知且曰暄素係賤工不識書字又與君侯無怨何得有此望君侯屏去左右暄以實告因告曰此內閣李賢與君侯不善因爲此本使暄投進亦不知中所言何事達聞之甚喜方飯至因以酒肉賞之值早朝直以其情復奏上命中官押諸大臣會問於午門之前方引暄至達欣然謂賢曰此皆先生所命彼與我無干也賢忽驚訝暄卽曰此達以酒肉

賜暄使暄言如此昨庭中有某某見指斥所奏達上其餘條畧
無餘蘊押官與諸大臣皆曰達不得辭其罪矣錄詞以進上
命法官正達罪謫戍廣西以死暄得脫袁復寵任如故京師人
多能道其事

雙溪雜記云國朝天下方面布政使按察司官及知府衛指揮
部查各衙門官歷俸淺深奏請銓奏內云查得某官歷俸年深
相應陞除某官而已宣德間三楊用事勅方面風憲郡守令在
京三品以上官舉保天下要職吏部不得除皆出三楊之間後
亦革去不用天順末李賢始令吏部方面官有缺推舉三人請
旨簡用至今爲例

瑣綴錄云李文達公初薦布政陸瑜爲刑部尚書石亨以私譖
之久不召對衆爲公危及瑜至當擬旨到任同事者謂且擬侍
郎公曰吾以尚書薦而改擬侍郎則自嫌不信矣竟擬尚書從
之後瑜頗稱旨乃復召對如舊公爲人恭莊嚴重得時行志不
爲小康曲謹平居號崇正學能納人言容善類無南北之分天
順庚辰會試罷予同衆考官見公詢及人物予曰五經魁中張
元禎神童也人物獨王一夔願先生留意又請選庶吉士英
廟諭公專選北人公曰南人亦須選乃會選於吏部元禎初不
與公曰此神童不可以貌取急追回與進之成化丙戌廷試王
冢宰以程敏政卷字精楷力贊爲第一公曰論文不論書卒取

羅倫第一 憲廟卽位進公少保華蓋殿大學士尚書如故踰
年丁父憂乞終制不許羅倫進言請許公終制詞涉詆訐公怒
力辭朝廷黜倫乃已予引文彥博待唐介故事請公留倫公曰
潞公市恩歸怨 朝廷吾不可襲此公之言亦未爲無理 又
云天順中李文達公獨見寵任時冢宰王九臯以老成大司馬
馬昂以儀表雖皆爲 英廟所眷遇而尤賴公所維持凡公有
所薦舉必先諭意於二公至 御前疇咨時於文則諉諸王公
武則諉諸馬公或旣自舉其人亦必曰臣所知如此還須召某
等再審二公亦如公言以是 上不致疑下皆信服

呂原字逢原浙江嘉興府秀水縣人自幼穎敏九歲能通孝經

小學稍長爲文輒驚動長者時父嗣芳兄俱爲教官識者曰此子殆穎脫而出者也未幾父兄俱卒於景州原尚朱成童孤貧不能歸喪或諷以胡俗焚之者原潸然出涕不從遂厝州城之東曰他日有力必歸之也年及弱冠乃奉其母歸家益貧攻苦力學知府黃懋閱秀水學官文奇學官對曰此邑選中呂生文也呂生貧不能補弟子員學官致家塾教諸子懋輒嘆郡中乃有文士如呂生遺草萊中者急召公見公入見衣藍縷甚試之舉業文詞理皆勝問之經書輒能默誦懋益驚異與之新衣謝不受會理葺黌舍與之諸餘材木又謝不受懋曰孺家貧鬻此且得善價又謝不能太守益大奇之當是時太守得輒補學諸

生懋卽遣公入學是秋發解浙江正統辛酉年也明年中禮部
會試廷對賜進士及第第二人擢翰林院編修得入秘閣讀所
未見書其學益富癸亥與修五倫書賜寶鏹丁卯 朝廷思用
奇才乃簡狀元劉儼等十人進學東閣入侍經筵原居其一景
泰初遣祭蜀王往還萬里間凡有饋送一毫不取未幾充經筵
講官辛未進侍講壬申夏以右春坊右中允兼侍講時選內侍
之秀異者四五人進學於文華殿之側命原與左中允兼侍讀
倪謙教之秋九月上自臨視命二人講倪講國風原講堯典講
罷問二人何官各以實對又問幾品皆曰正六品 上曰二官
同品安得相兼命取官制視之乃命原同倪謙俱進侍講學士

仍兼中允癸酉與修歷代君鑑秋八月主順天府鄉試丁丑與
修寰宇通志明年書成進右春坊大學士兼侍講每書成進講
輒有寶鏤白金文綺之賜天順改元 英宗復辟轉通政司右
叅議仍兼侍講春三月主禮部會試夏六月徐有貞旣黜薛瑄
請老乃召原與岳正入內閣知制誥尋進翰林學士庚辰春主
禮部會試尋總裁大明一統志凡金帶玉杯校服貂帽便蕃之
賚歲無虛月原夙夜感激思盡論思之職時老母病在牀躬調
湯藥憂形於色久而不愈壬午秋八月母卒原哀毀踰禮啓父
櫬歸西而葬之詔有司營葬命原襄事卽還朝原懇乞終制不
允抵家未及定期忽得風疾於是歲十一月不起年四十五訃

聞特贈禮部侍郎謚文懿命工部爲營葬事遣官諭祭於其家
仍命其子憲爲國子生皆異數也原天性孝友事母得其懽心
撫育兄子皆底成立宗族中有困乏者必推所有以賙之遇人
之危殆者濟之惟恐不及也歲時賞賚奉母之餘輒分遺鄉黨
僚友而自奉甚薄爲人沉毅有醞藉悃悃無華內端外和與物
無競處已待人不立崖岸事有不可則據理諍之未嘗諛言媚
色以徇人取悅三爲主考取士得人最多其教人也誠切懇到
善於警發故四方之士及門者衆其造詣益深作爲文章議論
超越皆有根據而理趣充然詩有典則音律渾厚無纖巧靡麗
之態初入翰林時楊文貞文定諸公咸器重之知其所就必遠

大及入內閣與大議所見出人意表而爲民之心尤切天下有陰受其賜者矣惜其享年不永云

閣學記云予觀楊文懿公誄原之文有曰繫樵李之鍾秀兮挺碩人其頎頎植仁義以爲本兮橫百行以爲枝劉文安公輓原有曰君子非始之難而終之難若公之終孝不忘於其親則無愧於其君矣蓋嘆原之學所從來者遠矣及國史所載謂其爲人寬厚不立崖岸事母撫孤克盡孝友其在內閣多所裨益郡志亦稱其內端外和與物無競程篁墩文菴遺事謂居官二十年家無田宅爲學務實踐不事多言蓋皆實錄也

岳正字季方順天府涪縣人長身美髯神采秀發氣屹屹不能

下物舉京闈鄉試卒國子業李忠文公時勉爲祭酒簡四方名
士置講下正與商文毅彭文憲王端毅諸公皆預焉正統戊辰
會試禮部同考誤寘落卷侍講杜公寧見之曰此我輩中人遂
擢第一廷試賜進士及第授翰林院編修每開口論大事嘗閉
戶夜草疏請復恭讓后位號其伯兄端俯樓隙窺之驚曰奈老
母何取其草裂之乃止景泰壬申遷右春坊右贊善兼編修天
順丁丑改修撰 英宗廉知其名吏部尚書王翱亦薦之 召
見文華殿 上遙見遽曰好旣陞陞登殿連曰好好問年若干
對曰四十 上曰正好問何處人對曰灤縣 上曰又是我北
方人問治何經曰尚書 上曰是書經尤善問何科進士對曰

正統十三年 上益喜曰又是我取者乃顧謂曰今用汝內閣
叅預機務凡事爲朕主張許彬老矣不足恃也正頓首辭至再
乃出赴閣至 左順門石亨張軌自外入愕然曰何以至此正
不敢對時亨軌已不平比入見 上曰今內閣朕自訪得一好
人亨軌請爲誰 上曰岳正亨軌陽賀曰誠佳 上曰但官小
耳今須與吏部左侍郎兼翰林院學士如何亨軌因奏曰 陛
下欲陞正亦甚易但姑試之果稱職未晚也 上默然蓋亨軌
以事非已出故撓之云爾自是宣召賜賚絡繹於道正感 上
知遇銳意功業知無不言言必盡肺腑一日欽天監湯序言變
異謂奸臣未盡之故 上以問正正曰奸臣未聞若求之將人

人自危且序術疎淺不足信事遂寢錦衣衛官校邏得一僧自言當大貴衆惑之至妻以女以覲非分獄具僧坐反太監牛玉援近例請官邏者正謂事縱得實不過合妖言律活其從十數人邏者准應捕律令給賞朝廷遽之時亨與太監曹吉祥怙寵擅權有投匿名書指斥時政者獨不及亨緝捕甚急舉朝惶駭亨勸上出榜募能捕告賞以三品職上令撰榜格正與呂文懿公見上曰爲政自有體捕盜賊責兵部奸宄責法司豈有天子自出榜購募之理且堯建進善之旌舜立誹謗之木秦始皇護短杜諫乃下誹謗妖言之令由此過失不聞卒至亡國陛下新復寶祚正當以堯舜爲法以秦爲戒縱欲窮治其

事緩則人情怠忽事自覺露急則人情恐懼愈求韜晦不如勿
究吉祥從旁請究甚力 上徐謂曰正言是也亨從子彪鎮大
同遣使獻捷內閣詢其狀其人盛陳戰伐且稱斬首無筭皆梟
於林木不能悉致正取地圖指示曰某地至某地四面皆沙漠
梟於何所其人驚伏正間爲 上言曹石勢太盛慮有變宜早
爲節制 上曰汝可以朕意告之正徑造亨諷令稍自斂戢二
人怨之益深會承天門災 上下詔責躬實正視草歷陳弊政
有曰敬事 天神有未盡歟 祖宗成憲有不遵歟善惡不分
而用舍乖歟曲直不辨而刑獄寃歟征調多方而軍旅勞歟賞
賚無度而府庫虛歟請謁不息而官爵濫歟賄賂公行而政事

廢歟朋奸欺罔而阿附權勢歟羣吏弄法而擅作威福歟徵歟徭役之法太重而閭閻田里靡寧歟讒諂奔競之徒倖進而忠言正士不用歟抑爲軍衛有司關其酷暴貪日無厭而致軍民不得其所歟詞極切直天下傳之遂有飛語指爲謗訕七月

內批降廣東欽州同知道鄒以母老留閤月尚書陳汝言曹石黨也憾正嘗言其不可用至是嫉邏者以私事中之逮繫詔獄拷掠備至謫戍肅州鎮夷所所居京第爲幸臣都督李鐸所奪至涿州夜宿傳舍手楷急氣奔且死涿人楊四者頗尚意氣爲所哀解人怒不肯楊醉以醇酒伺其熟睡謂正曰楷有封印奈何正教之曰可燒鑒令熟以酒噴封紙就炙之紙得燥皆昂起乃

去釘脫桎剝其中復釘而封之其人覺有異楊說之曰業已然
矣今奉銀數十兩爲壽不如納之正乃得至戍時太監猛虎石
一鎮甘肅相傳有 密諭須生不須死鎮巡而下亦雅重之致客
禮焉 上每憶及輒曰岳正倒好只是大膽越四五年曹石俱
以不軌敗 上謂內閣李文達公賢曰向岳正固言之文達因
請曰正有老母得放歸鄉里幸甚乃 命釋爲民甲申 憲宗
嗣位有御史楊瑄者亦以劾亨謫戍廣東臺諫請復二人官以
旌忠直吏部擬調南京有 旨勿調正在院供職充 經筵講
官纂修 先朝實錄文達欲薦爲南京國子祭酒正不應有思
者僞爲正劾文達疏草會廷薦正爲兵部侍郎清理貼黃與都

給事中張寧名並上寧負才氣亦被譖遂皆補外正得知興化府時論譁然爲之不平正才素大不屑條格動輒爲闊遠計興化地平不足用正察民間利權而操之府於是建涵江書院及孔子廟鑄祭器下諸縣作小西湖開兼濟河築南北隄塞白埕港別購民田開河直趨涵口修江口橋池如通津鐵河猴溪諸橋多修治而白埕功最鉅復購穀實饑民倉出羨餘以補料價民輸料京庫類多侵尅正親爲會計且教之納省其半費士大夫家食利於官弗得其貴有力者共騰爲謗書橫不可遏惟彭惠安公韶陳太常音保其無他有叅政陳蕙者按閱其事皆有據乃正亦厭吏職以成化己丑入覲京師因引疾致仕時季

鐸已敗 朝廷還其故第居久之陳緝熙刑遜之二公爲祭酒
有官錢爲公用簿不時註忌者因爲媒孽皆得罪去彭文憲勸
正請代之正曰此事正所不直安忍代爲自是當道交絕忽喪
幼子慟而成疾壬辰九月十一日卒年五十五正於書無所不
讀謂天下事無不可爲高自負許俯視一世其爲文高簡峻拔
追古作者詩亦雅健脫俗字法精邃大書尤偉旁及雕繪鐫刻
悉臻其妙嘗戲畫葡萄遂稱絕品晚好皇極書有所論述及經
解皆未及就惟類博稿僅存十卷行於世深衣纂疏一卷藏於
家

本東陽贊云才之難其信然哉非才之難用才者之難也我

皇明十區夏幾百年至於宣德正統之世庶富而教極矣公當是時以文學取甲科天順復辟之初出膺召命居宥密遭際之盛擬諸夢卜感慨奮發忘身徇國方將以功烈顯於天下而爲權奸所構又厄於媚嫉投荒處僻竟不究其志以死豈才弗能哉夫當英宗之感悟憲皇之更化幸於側有人焉猶且復用用則猶可以自見也惜哉然公之文章氣節震播海內傳之後世有斷斷乎不可泯者興化人旣去而思爲祠以祀之他可知已或乃以浚恒之凶不密之失爲公累是徒以成敗利鈍論非所以防世厲俗也謹備述之以補國史之闕

一 松東日記云岳季方在內閣不久被黜有士人告之曰先生犯

孔子戒矣問之云何則曰未信而諫是也季方應之曰初上用我左右責任教戒甚至敢不盡心若子以諫官處我則恐未然

類博稿云有自京師來者傳天語下甘肅曰岳正倒好只是大膽或以賀正曰上念公如此行召公矣曹生爲寫陋容遂皃括爲其辭題於上曰岳正倒好只是大膽惟帝念哉必當有感如或赦汝再敢不敢臣嘗聞古人之言蓋將之死而靡憾也野記云丁丑承天門災岳編修正草詔罪已甚至曹石相謂言奸邪蒙蔽不謂我曹抑不謂徐有貞乎譖於上上命杖岳百下謫戍肅州室廬財產盡賜指揮李鐸得旨自往據岳門檢括

淨盡家人出門一一搜驗苛辱待之未幾 上宥岳得還適鐸得罪 上曰季鐸家盡是岳物可悉取還之岳乃往據鐸門搜括如鐸亦復昔怨初岳爲儒臣貲無幾何鐸奏稱不貲皆歸於岳

陳文字安簡江西吉安府廬陵縣人自幼秀拔異常兒七歲卽知向學說書大義鄉老長莫能難父祖咸喜曰大吾門者其在此乎年十五遣游邑庠旣而憲司論秀陞補郡庠弟子員夙夜淬礪學業大進同輩咸讓其能宣德乙卯以詩經中江西鄉試第一明年正統丙辰中禮部會試入對 大廷權第一甲第二一名授翰林院編修時翰林三楊公負天下重望目文儀觀偉然

遇之甚厚文貞公且爲易其字安固曰安簡云一考最 賜勅
命進階文林郎卽日奏乞歸省重慶在堂鄉黨榮之辛酉復任
癸亥丁外艱歸丙寅起復與修五倫書丁卯有 詔簡翰林之
臣才器優等者十人俾進學東閣蓋期以大用文其一也一日
修撰商輅侍班 上諭學士曹鼎曰商輅着展書宜選一人爲
對初選修撰王玉弗稱旨再選文乃允尋侍經筵與商輅爲偶
己巳秩滿陞侍講景泰庚午秋考順天府鄉試去取公明防範
周密與論稱之辛未少保高穀上疏言文才識兼優內可居六
卿之佐外可任藩臬之正特陞雲南右布政使雲南地遠民罷
每歲供餉貴州勞費尤甚乃畫策令商賈代輸而增值以給之

於是商民兩便歲省民費十之五所屬課鈔近百萬爲典守侵欺者多卽痛革其弊課以羨溢他如按籍均徭興學勸士葺貢院修地誌與凡益官便民之事靡不興舉逾年政教大行一考滿巡撫僉都御史鄭顥言其政蹟卓異天官請 賜誥命示旌勸焉丙子冬入覲至京師丁丑春還會 英廟復辟見商輅曰曩經筵與卿爲偶長而偉者爲誰其人安在輅曰陳文今任雲南右布政陞廣東左布政使以丁母憂不果赴戊寅驛召授詹事仍食從二品祿乞終制弗允入侍 東宮癸未學士呂原卒上問大學士李賢誰可代者賢曰柯潛可賢出吏部尚書王翱問內閣之缺爲誰曰已於 上前舉潛矣翱曰潛固好然陳文年

資皆深用潛置文於何地賢默然曰業已舉之矣翱曰復見

上言之何妨明日賢見如翱言上乃陞文禮部右侍郎兼學士

叅預機務及文入閣與賢爭事曰吾非汝所薦也士論短之甲

申英廟上賓憲宗嗣位一時禮儀政令皆文與二三大臣

裁定以舊恩陞吏部左侍郎兼職如故是時詔下罷貢獻停造

作以及開言路賑貧養老諸事多文等弼成之尋命同知經筵

事纂修英廟實錄爲總裁官成化紀元乙酉侍上祀南郊

耕籍田幸太學屢蒙厚資三月特陞禮部尚書兼學士尋進階

資政大夫正治上卿丙戌三月充廷試讀卷官逾月奉命持節

爲副使冊封賢妃八月冊封親王復命爲副使俱賜銀幣寶鈔

有加丁亥八月奉命釋奠先師孔子會實錄成陞太子少保兼
文淵閣大學士尚書如故錫宴禮部并賜白金綵幣衣服鞍馬
戊子二月釋奠先師孔子是月晦吏部以文三滿聞上遣
中使齎賜寶鈔羊酒於家是日遽得疾上復遣中使臨問賜
予加厚仍命太醫院官視療再踰月竟不起年六十四訃聞命
工部具棺塋墳遣禮部尚書姚夔致祭贈榮祿大夫少傅謚莊
靖文爲人志氣豪邁才識通敏自入翰林雖專文學然於時政
弛張輒能言其當否故每以治才自負人亦以是稱之無異辭
其自方伯入爲宮臣職清務簡名其燕居曰需軒賓客過門輒
置酒款延相與賦詩論文談笑以爲樂比入內閣甚自矜持正

色鮮言不少假借又篤於故舊有在患難者必極力拯之聞有一善必稱道獎與惟恐其不著惟忌嫉過甚取予不辨人多議其失守其爲詩文敏妙雄健似其爲人所著有聚齋稿需軒稿若干卷藏於家

劉定之字主靜江西吉安府永新縣人自幼天資絕倫過目成誦父石潭公日授以書不令作文字定之每私爲之一日病石潭公於床褥間得所作祀竈文詠桃漿諸詩大驚異然亦未嘗口許之自是稍敢以文辭進然每進輒斥之一日又以所作文字進石潭公曰此子有八面受敵之才宣德乙卯中鄉舉正統元年丙辰會試第一名賜進士及第三名授翰林院編修四年

已未京城大水 詔求直言定之上十事其一曰號令之出宜求其大公至正久而無弊信賞必罰不爲苟且其二曰公卿侍從宜時常召見俾承清問因以觀其才能察其心術而進退之其三曰降胡近處京畿宜漸分其類移近南地其四曰宜以京官出任郡縣使民得蒙循良之政其五曰宜倣唐制朝官陞任之時舉賢良自代其六曰武臣子孫宜習韜畧其七曰守令宜加詳察其八曰宜鋤富恤貧其九曰廷臣丁憂宜令終制其十曰宜遏僧尼奏留中不下十年秩滿陞侍講十四年己巳北虜犯驛適 景帝登位定之上十事其一言戰陣宜倣古減火鎗增刀斧其二言守禦宜繕亭障塞蹊隧其三言簡用使臣四言選

移降虜五言兵士月錢六言戒守令虐民七言選賢充將八言
武臣濫爵九言總攬權綱十言經筵進學 上嘉納之景泰三
年壬申陞司經局洗馬時北虜遣使來朝固邀廷臣往報居言
職者以爲虜懷窺伺之心宜絕之而勿往執政柄者以爲苟不
往報恐開邊釁乃上疏屢數十百言備陳前代所以待夷狄之
道與今國勢之強弱事理之順逆以爲宜暫遣使以羈縻之使
我得以益修內治倘我以和往彼以惡來則足以增我師之直
氣 朝廷雖從言官之議而亦以公言曲盡事理云七年丙子
陞右春坊右庶子天順元年改通政司左叅議兼侍講是冬進
學士甲申選太常少卿兼侍讀學士修實錄充副總裁官成化

丙戌簡入閣叅預機務明年秋陞工部右侍郎又明年轉禮部
右侍郎俱兼學士定之明習練達備嘗世故居內閣再進密疏
皆國家大計凡處事公正而操履嚴謹視昔有加一日使傳旨
命製元宵詩定之據几不停揮頃刻成四句七言詩百首以進
其敏速如此惜未究其所施云

大學士彭時云公襟度坦夷操履謙謹與人語色溫氣和惟恐
傷之遇人無貴賤大小一於恭敬自下若怯懦然至其居官論
事則根據義理詞鋒峭厲雖勇者弗及

尚書劉宣云公之學自六經子史下至小說雜技釋老之書無
所不窺終身猶成誦非他人彷彿記憶者比其爲文數百千言

援筆立就雄渾高古變化莫測逼真蘇氏父子者居多初年所著經義及策略業舉子者家傳而人誦焉年十七八已名動郡邑間比登進士遂名動天下不惟公卿輔相與士林中知之雖武夫悍卒亦無不知之者求文者日踵門戶公皆曲爲應答不少厭倦初北虜之變內外章疏無慮千萬惟公之奏爲人所膾炙云性尤孝友微時苦家貧年弱冠卽授徒於鄉資束修以養親每暮夜歸侍晝則赴學館一日冰凍徒涉手足皆龜拆比就館則早食已罷公隱忍至午方得食其貧困蓋如此旣入仕卽分祿歸養而已惡衣菲食無異寒士或以爲居侍從者不宜如此公亦不能從其言也

復齋日記云永新劉文安公作宋論論宋徽宗崇尚老氏反覆
言釋老之不足信而極言世之人君奉其神養其徒竭生民之
膏血積山填海不足以侔其費而不免於危亡之禍可謂深知
其害者矣既知其害胡不一言以悟乎上以去夫生民之害以
弭夫危亡之禍乎文安在翰林十數年執政數年非不得言者
夫不知而不言與不得言而不言猶之可也今既知之又得言
之而卒不言其何用托之於空言乎

閣學記云予自兒時五洪家君嘗誨以文安之受教於石潭君
也雖古人亦無踰焉乃取呆齋諸稿讀之郁郁乎盛矣及閱國
史乃見其昌言直氣卓不可撓沛不可禦昔人所謂此皆節義

文章可相屈耶惜乎用之既晚未究厥施西涯其知言哉

萬安字循吉四川眉州眉山人長身魁碩眉目劄劄畫外寬然
長者而內深刻刺骨正統戊辰進士時英廟僉純選北方及
蜀士爲庶吉士凡二十人安與選授編修景泰三年以易儲陞
左春坊司直郎仍兼編修四年陞右中允七年改尚寶司丞仍
兼編修天順戊寅改翰林院侍講侍皇太子讀書六年陞翰
林學士成化二年丙戌主考會試三年預修英廟實錄成陞
少詹事兼學士初安同年在翰林者八人各爲黨友惟安無所
交李泰內臣養子也安專與泰相結爲腹心己丑內閣闕人且
欲用泰泰推安曰子先爲之我不患不至遂薦安陞禮部左侍

郎兼學士入未幾秦暴死安在內閣初無學術日以囑託貪賄爲事又多結宦官爲內援見所屬無問賢愚惟有內援者則用之十一年彭文憲公時卒加禮部尚書十三年喬文毅公輅去位安進首相加太子少保改戶部尚書兼文淵閣大學士孝宗出閣改吏部尚書兼謹身殿大學士十六年加太子太保十八年加太子太傅二十一年加少傅兼太子太傅二十二年加少師兼太子太師吏部尚書華蓋殿大學士初竊德貴妃萬氏侍憲廟於邸儲其父貴爲諸城邑吏至是以妃貴授都督兄通亦爲錦衣都指揮權寵震耀通妻王氏出入掖庭安喜同姓陰使人結通之妻往來於家爲進妖僧繼曉以固其寵時江右

李孜省亦以小吏幻術與其徒鄧常恩俱驟躡要津安托孜省鄉宦學士彭華深相結納凡附已者百計拔之異已者百計去之一時詞臣若禮部侍郎邢讓祭酒陳鑑而方正之士如王恕馬文升耿裕秦紘皆相繼斥逐雲南土酋暴卒弄與米邦爭構據寶林以叛賄於安罔其利卽授以安撫而邊境日積時內閣三人劉珝劉吉珝狂躁吉陰刻皆爲天下所輕方昭德好奇翫中外有結內臣進寶翫則傳旨與官以是府庫竭爵賞濫三人不出一語爭救故時有紙糊三閣老泥塑六尚書之謠吏部尚書尹旻左都御史王越與劉珝爲一黨安與彭華爲一黨互相詆傾久之安以計排珝斥去之越與旻亦相繼罷去山東人

在朝者去之一空舉朝側目莫敢顯訟其過二十三年庶吉士
鄒智進士李文祥中書舍人吉人皆論之安自票旨令吏部選
除李文祥繁難衙門做縣丞著歷練鄒智與安皆蜀人智言安
貪位固寵老無廉耻劉吉附下罔上漫無可否天下之小人也
王恕彭韶天下之君子也尤忤內閣意御史姜洪文貴等各相
糾劾俱不報御史湯鼐差印馬詣內閣會勅安謂鼐等曰近者
詔書裏面不欲開言路我等扶持科道再三陳說方添此一段鼐
卽上疏人臣之義善則稱君過則歸已安等乃歸過裏面而又
俟臣等以扶持之說不知安所謂裏面者將何所指謂內臣耶
謂朝廷耶乞追寃所指且治其欺君誤國之罪鼐俟 命司禮

監宣入內令跪聽命。劄曰：令劄跪者果。聖旨耶。太監命耶曰：奉旨。劄乃跪久之。疏留中不出。太監曰：可歸矣。劄以手拍地大言曰：臣所疏皆經國大事，何爲不見施行？孝宗在東宮，稔聞其惡及嗣位，至是於宮中檢獲所進疏一小篋，皆房中術也。遣太監懷恩携至內閣，示之。每展一卷，曰：是大臣所爲乎？安慚汗不能出一語。已而科道劾之，懷恩以其疏至內閣，令人讀之。安跪而起，起而復跪，哀泣乞憐，無去意。恩令摘其牙牌曰：請出矣。安乃惶遽奔出，索馬歸第。初，安久在內閣，不去，人或微諷之，答曰：安惟一死報國，及被黜，在道猶看三台星，冀復用也。其無耻又如此。安貪賄至鉅，萬安死，妾媵子弟懷以奔人家，無餘。

者卒贈太師謚文康其子翼爲南京禮部侍郎孫弘璧爲編修俱淫恣不檢類其父後相繼而死絕嗣

瑣綴錄云戊申歲縣丞徐項上疏請理 皇妣薨逝之由以復

不共戴天之讐疏下內閣擬 旨大學士萬安劉吉尹直俱在

萬劉皆不欲行只請 上自處內臣將本去尹復謂曰非不准

行只請 上示寬嚴輕重之意庶好擬旨批示踰三日詢知本

在御前尹語萬劉曰此本不出徐必再言或有他人言必來問

所以不行將何以對今須請出擬行於是內臣將本來擬尹擬

法司看了來說劉曰法司便要拿人且着禮部尹曰禮部吉凶

禮文煩擾不暇萬卽依劉擬禮部復本請拘萬家親戚內眷曾

經出入宮闈者究問安實與萬家通好懼甚私謂尹曰我與萬家多不往來尹慰之曰此事只宜寬處若與大獄株連蔓引豈先帝之意哉劉喜曰盛德之言也少頃太監覃安等將禮部覆本來議擬旨萬曰如何劉曰先帝存日云云覃搖首不然久之目尹曰先生如何說尹徐應之云宮闈往事朕承皇太后洎母后宣慰明白你每說的都是外面浮議難憑訪究姑從輕處云云覃曰好遂如所擬不行

雙溪雜記云成化以後居內閣官者存心正大不招權納賄與六部相處自無矛盾六部事有違失內閣官密裁抑之六部自然畏服惟欲招權自專遂生仇隙尹旻由吏部侍郎陞尚書掌

銓衡者十八九年選法公平士有定守萬安爲內閣首相深惡之每語所親厚者曰言官有能劾尹同仁者勿憂無大官做然旻在吏部久公論已歸又壽光劉詡與旻同鄉相厚亦在內閣位並於安能持正論安雖害旻爲詡所梗不得行及詡因易爲安所讒間罷免安遂引尹直入閣託所私道士李孜省讒旻罪下旻子侍講龍於獄令旻致仕連及旻鄉里故舊皆降謫外補才望如侶鍾張海輩亦在貶謫之數成化丁未孝宗登極李孜省下獄死尹直罷黜臺諫交章論劾萬安極其醜詆賤劉吉亞安位素附安因爲之地寢不行庶吉士鄒智進士李祥中書舍人吉人皆論之相繼貶卒

殿學記云予讀國史見成化間保陞乞陞冒濫名器者無慮數千固已訝之及閱萬氏本傳安據內閣二十餘年嫉侮中正深於仇讐保養奸回切於骨肉觀其結萬通李孜省輩以陰爲之援而又斥逐鄒智吉人輩以陽張其勢自古權奸之禍人家國類如此易曰開國承家小人勿用可不鑒哉

瑣綴錄云成化辛卯十一月末旬彗見廷臣建言皆爲君臣懸隔不通請時召內閣大臣面議機政彭可齋亦對司禮監官言莫謂上不得見雖諸老太監亦不得見以是內臣難於辭拒乃約一二日請上御文華殿召見衆先生但初見時情未洽浹不宜多言姑俟再見可說先生諾之至期約將入復約如初

既見可齋言天變可畏。上曰已知卿等宜盡心辦事可齋又言昨御史建言減京官皂隸與俸文職尚可武官不免怨望急須傳旨仍舊以慰安之。上曰卿卽傳旨與該部萬先生連呼萬歲二人皆同聲叩頭復命光祿賜酒飯而退自後再不召見諸太監乃謂人曰常言不召見及見無一奇謀正論止呼萬歲四方因傳爲口實曰萬歲閣老云蓋中官初懼有所言戒約至再後喜無所言反見譏誚然先是御史建言欲減京官皂隸俸皆承太監黃高風旨欲以此難京官不虞武職恟恟咸欲刺言者一時莫能解救及此召見得旨兵戶二部遂請裁處卒如舊不減人情始大安而言者亦自相慶惜諸公爲中官所

証未及盡言所以相見之後益悔無及予在閣時常欲請面見萬循吉止之曰往年彭可濟每面見一語不答卽叩頭呼萬歲不敢盡言今我輩每事盡言太監擇而轉聞無不允從勝於面對是亦有理

劉珣字叔溫別號古直山東青州壽光人幼穎悟氣識豪邁甫五歲時有一老人相曰是兒面有紋類丞字後必爲相八歲能文過目輒成誦正統甲子科年十九以壁經赴省闈道經臨淄適河水泛溢僕馬俱溺水行半里餘神色自若人大以爲異旣而果高第乙丑會試弗利卒業成均大司成卒時勉喜其才思敏捷每試居優等登戊辰彭時榜進士選入翰林進學改庶吉

士鄉先達許彬嘗謂人曰此子文有氣焰異時必爲社稷臣已
已授翰林編修景泰丙子修寰宇志成陞修撰天順丁丑陞右
春坊右中允侍 東宮講讀八年甲申 憲廟登極以舊寮陞
太常寺少卿兼侍讀成化三年 英廟實錄成陞太常寺卿兼
侍講學士五年已丑主考會試十一年陞戶部右侍郎兼翰林
院學士入內閣十二年丁酉陞戶部尚書仍兼學士十四年加
太子少保戶部尚書兼文淵閣大學士十八年文華寶訓成加
太子太保戶部尚書兼謹身殿大學士珤在講筵甚久受知
憲廟呼爲東劉先生特賜圖書其文曰嘉謨贊翊性剛直決天下
大計一言而定利害不能奪然積忌傷人爲士大夫所短二十

二年或構以飛語假俳優以中傷之翊遂乞休詔允之卒謚文和

閣學記云予觀東土志謂翊事親孝母沒廬墓時父舅在翊昧爽問安畢復詣墓所郡守李昂表其里曰仁孝豈卽昌黎所謂出則秉笏垂魚入則問安侍膳者耶於乎孫子之昌固有本矣劉吉字祐之直隸保定府博野縣人號約菴自幼動履異常稍長讀書從江右劉御史克彥學穎敏勤勵甚見稱許正統丁卯登順天府鄉試戊辰第進士選入翰林爲庶吉士尋授編修景泰元年庚午充經筵官預修君鑑七年再修寰宇通志成陞修撰天順丁丑英廟復位命祀漢文帝唐太宗諸陵已卯預修

大明一統志庚辰鄭世子及涇陽王以事召至 命侍講讀時
憲宗爲皇太子因 命侍講讀於青宮癸未丁內艱成化元年修
英宗實錄起復至以吉舊官僚進侍讀三年丁亥實錄成陞侍讀
學士仍充 經筵官侍講讀 賜金帶等物五年己丑進禮部
右侍郎八年壬辰轉左侍郎明年夏旱遣祀東嶽等神十一年
乙未始 詔以本官兼學士入文淵閣叅預機務十三年丁酉
拜禮部尚書仍兼學士明年加太子太保兼文淵閣大學士十
八年丁外艱去位 上特起復之因降 勅遣官召還視事時
孝宗在青宮 命儒臣修文華大訓以資講讀書成進太子太保
兼武英殿大學士尚書如舊尋進階光祿大夫勳柱國二十年

甲辰轉戶部尚書兼謹身殿大學士二十二年丙午進少保兼
太子太傅二十三年丁未 孝宗卽位再進少傅兼太子太師
吏部尚書大學士如故知 經筵事吉自入相以來阿附萬安
欺上罔下漫無可否故庶吉士鄒智輩劾安必及吉至於臺諫
指摘極其醜詆安既去位吉爲首相盡逐排已者中傷之又善
取名陽爲正論以蓋陰私弘治二年己酉二月吉會同官上言
邇者奸徒欲效李孜省鄧常恩之故術見月宿在畢天將陰雨
乃奏請祈禱幸而留中以希進用謹按詩云月麗於畢俾滂沱
矣書云月之從星則以風雨今月宿在畢雨降之徵也臣恐倖
門一開爭言祈禱啓霽召亂咸基於此所有祝文臣等不敢奉

命庚戌又率同官上言邇者妖星出天津歷杵曰近宮室考之
圖史爲兵爲饑爲水旱矧今南海修垣汝河修橋俱非急務宜
停止以答天戒上俱納之三年憲宗實錄成以總裁之勞
加少師兼華蓋殿大學士其冬秩一品降勅獎諭勲加特進
兼支大學士俸賜資甚厚五年壬子修撰張昇上疏論之吉
至是以老數上章求退上允之益加賜資令有司月給米
五石歲撥僕夫八名仍降勅護吉還鄉踰年癸丑疾暴作不
起年六十有七吉容貌魁偉舉止凝重性善記憶能歷道往事
爲文章平實不浮凡考鄉試一會試二廷試讀卷三或朝廷
大禮輒持節爲使蓋入仕四十五年居內閣者十八年富貴

榮顯已極爲尚書時尤及封其父如其官而忌害忠直世多斥之

治世餘聞云劉閣老吉博野人屢干清議言官論之輒得溫旨人謂之綿花以其愈彈愈好也

雙溪雜記云弘治初劉吉用事威權焰赫無敢少忤其意者獨諭德張昇上章極言吉奸邪蔽主之狀且言其能駕馭臺諫聽其指使害人吉諷六科十三道交章劾昇陰沮言路調南京王部員外郎吉初報復言官論已悉加貶竄而言官甘爲鷹犬不愧昇江西人中狀元後官至禮部尚書爲劉瑾所逐致仕

又云弘治初言官論薦大臣必以王恕爲首及論劾大臣指斥

萬安必連及劉吉至於南京科道保舉王愬入閣乞速罷去萬安劉吉言尤激熾巡河御史姜洪專劾劉吉舉李東陽謝遷等吉深啣之及王愬落至不得入閣而劉吉代萬安專政內外不合愬有所行吉從中沮之愬舉羅明丘璽吉以爲私故舊票旨云留邊方用時中官蔣琮等守備南京訐奏給事中方向等劉吉報前劾已恨貶謫殆盡給事中周紘御史張曷南京教場點軍數少不准破調守備官奏其刀蹬劉吉票旨令吏部調外任愬執奏紘曷奉命點軍不宜調吉票旨云周紘張曷點軍不到如何不卽奏聞却乃展轉刀蹬挾制人已從寬調外任了罷愬復奏言天下大事賞與罰而已賞必當功罰必當罪此爲

之良法也今不治失伍者之罪反責黜操者之官後來何以使人哉吉不聽必欲調外任因不知外缺票旨張昺調南京通政司知事周紘調南京光祿寺署丞後姜洪巡按湖廣令布政司抄案轉行漕運都御史秦紘論湖廣稅糧紘奏洪犯分刑科都給事中陳璘等駁論紘數目不明十三道御史論紘剛愎吉票旨俱罰俸以事干大體令禮部會議調洪知縣其果於報怨類此恕奏薦戶科給事中陳壽爲大理寺寺丞吉諷御史論壽不諳刑名改南京光祿少卿恕又薦太僕寺少卿白思明爲左僉都御史巡撫延綏吉諷御史魏璋等論其不協人望調外任知府恕憤吉沮抑然不敢明言爲吉所沮但屢疏辯明求退票旨

云不必深辯人皆知恕爲吉所媚嫉畏其威權不敢言如魏璋等爲其鷹犬皆得京堂美官云

又云 孝宗封張后弟伯爵劉吉不從言必盡封王周二太后家子弟乃可封由是 上惡吉權令自陳同事者票旨極其褒美 士皆塗之止留不允所辭四字發出及再陳遂致仕當時好事者以爲吉前票王恕辯本曰不必深辯今吉自陳本曰不允所辭四字對也相傳以爲笑談蓋劉吉嫉害六卿雖未至如徐有貞萬安之狠毒而怙權挾詐蔽上行私排抑忠賢亦自來所無者也

嚴學記云予讀國史謂吉沉毅能斷但所與遊者多讒夫以故

不聞其過廷臣不協於已者陰嗾言官劾之乏休休之量及讀
月畢天津之疏又有不可撓者其然乎其不然乎

彭華字彥實江西吉安府安福縣人生負異質年十九領鄉薦
景泰甲戌會試第一登進士第選爲翰林院庶吉士十七年修寰
宇通志成授編修天順元年奉使靖江王府還戊寅與修

大明一統志以多支廩餼坐除名賴大學士李賢救免八年 憲

宗嗣位入侍經筵成化三年丁亥 英廟實錄成以纂修校正

功遷侍讀四年戊子充講官五年己丑進侍講八年壬辰提侍
讀學士攝詹事府事 賜金帶十三年修續資治通鑑綱目成

遷翰林院學士 孝廟出講儲宮華首講大學尋掌院事十五

年用內閣萬安薦超擢詹事仍兼學士十八年 御製文華大

訓成進講 儲宮加從二品祿嘗主考兩京秋闈再典會試文

衡兩充 廷試讀卷官藻鑑詳明得人最多方復考會試有貴

家子在選硃墨卷不合華黜之失志者欲中傷之竟不能爲害

二十二年陞吏部左侍郎仍兼學士入閣預機務 制誥冊命

多出其手本年驟得風疾上疏辭不允進太子少保禮部尚書

辭亦不允 賜麒麟服丁未懇辭得 俞旨歸就醫藥與疾出

都城過 闕門匍匐稽顙泣下沾臆歸未至以上 太皇太后

徽號恩 詔贈祖考如其官贈祖母妻俱爲夫人華才識超

邁而深沉嚴重人莫窺其際實則坦亮可親平居不妄語笑及

論畫國是從容應酬有餘裕窮計極慮者殆未之及焉然阿附
萬安與妖人李孜省相比以故肆譏投間亟亟若狂如尚書李
秉王恕馬文升秦紘侍郎邢讓祭酒陳鑑與其同鄉劉宣羅璟
相繼斥逐華之力居多未幾卒謚文思

閣學記云予觀吉安志謂華才識超邁望重一時及讀國史累
千百言皆極其醜詆又謂羅倫之逐張元禎之劾皆原於華予
不敢盡信姑存其著者

尹直字正言別號寒齋江西吉安府泰和縣人直在孕蕭夫人
夢巨螭入室其將誕也族祖仲玉仲謙見其家紫氣騰上以爲
失火旣聞直生相顧賀曰亢吾宗者必此子也兒時穎異過人

稍長爲文奇逸儻輩皆出其下景泰癸酉領江西鄉薦明年甲戌中禮部第二 廷試賜進士出身改翰林庶吉士與修纂宇通志丙子五月除編修天順改元奉 命祭南海戊寅與修大明一統志 憲宗御極充經筵講官與修 英廟實錄初 景皇帝名號未定或欲從昌邑更始例直力辯不可成化丁亥實錄成陞侍讀上言典章制度必大備於文明之朝著述無修當不廢於承平之世我 祖宗神功聖德雖登於秘史其儀文法制未載於全書雖有諸司職掌然遺略尚多更革不一欲示永久曷萃大成乃若通鑑綱目起自周威烈王迄於五季茲宜續修以成巨典 上是其言是年與校貞觀政要己丑春祀四陵

以秀王主祭陪祀官循舊分行直言往者兩太王主祭故陪
祀者可分王今徧詣四陵陪祭者尚可分耶禮官怙然從
之壬辰陞侍講學士所講必傅時政辭意誠懇上每為感悟
乙未陞禮部右侍郎南京地震廷臣疏請修省局直其稿所陳
多觸時忌同列頗難之直請獨任其責帝大賞慰往年有遺
賞數以萬計咸謂夷情宜勉徇直言給賞據當時名籍豈有遺
者若一墮小人欺目之計將來何以繼之未幾來者果踵相踰
衆益服其明決宣府左衛請度僧行百餘人直曰是皆在邊嗣
卒豈可空什伍以充梵刹乎議通行諸邊禁止之內中以文憂
歸己亥服闋改南京吏部甲辰陞南京禮部左侍郎請法出欽

天監生徒之冗濫者值歲旱 命大臣會法司獄獄過刻立異
者往往猶欲復勸直謂深求淹繫豈緣旱卹刑意耶由是多從
輕宥蓋直所存平恕在兩京一再審錄閱情有可矜輒爲辯救
得減死論者數人丙午 召爲兵部左侍郎會貴州守臣奏叛
苗勢甚猖獗宜合兵亟勦之直言此必貪功生事者冀有所指
取苗勢未必然也力贊大司馬公請遣御史往勘卒以撫定是
年九月改戶部左侍郎兼翰林學士入 內閣叅典機務尋加
太子少保陞兵部尚書 賜麒麟衣一襲直以首相萬安爲知
已遇事裨救爲多一時 制語典冊亦多直手丁未 皇貴妃
萬氏薨 上諭欲歛以黃且用后葬直與同官方爭乃止時占

城王千古來爲安南所逼棄國至廣求援該部議令守臣送之還國直言遠夷爲強國所侵其來想者恃我能爲之主也若徒遣之歸而一無所處是棄之矣宜令大臣至廣審度事宜且

勅責安南敦睦隣好庶不失以大字小之體因薦都御史屠濬往由是安南歛戢古來得領封還國邊情緩急直臨事以意籌之多中肯綮夏不雨直與同官疏致旱之由上爲輟建寺工役省禁中齋醮放宮女三百餘人逾二日雨各賜官扇一上繪魏徵像書御製良臣賦蓋旌其言之善也尋以皇太子冠爲宣祝使遂賜玉帶八月憲廟上賓遺詔中有欲加一二語者其所關甚重直取天順甲申舊章示之乃止孝宗旣嗣大

寶知直附萬安一日有旨欲召用內監舊臣懷恩之在南都者直謂此非初政急務而其機已不可遏乃上章引避不允懷恩既至直與萬安蓋不可復留矣直歸老於澄江之上猶日以講學爲事士大夫過者必被容接未嘗厭倦晚年氣體益壯步履如飛少年或不能及蓋居林下者二十七年八十有五而卒謚文和直身長偉貌望而知其爲台鼎之器襟宇闊略議論英發文章豐蔚雄鬯其氣充然與丘文莊公彭文思公舉進士爲同年以博雅更相推服嘗同考會試者二考南京鄉試及會試者各一鑑別精確得人最多若謝文莊羅一峰程篁墩吳文定尤號稱魁傑之士平生著述甚富其傳者有澄江集名相贊南

宋名臣言行錄皇朝名臣言行通錄明良交泰錄瑣綴錄或謂江右李孜省用事直密與通爲時所譏但其斥中使李毅之誣辯御史吳珍之寃人又稱之

立齋錄云初直爲翰林侍讀學士一日禮部侍郎缺自歷城尹公素不滿直他有舉薦上皆不允內批以直爲之翼日廷遇歷城舉笏謝之歷城曰公簡在帝心者自此結怨尤深已而直服闋到京適今少傅大司馬馬公爲兵部侍郎被宦者汪直誣奏謫戍直以兵部非所宜爲請補南京禮部未幾寵寢裴直經營再入歷城久不許直凡詩文詞語率寓嗟怨不平之意後旣與李孜省黃景輦擠罷歷城及作丁未會試錄序末云登名

是錄者異日有服大僚亦斷斷焉休休焉好惡用舍一循乎理
視天下爲一家中國猶一人俾無一賢不効於用云云世爲有
光於科目設或此町彼畦妬賢忌能且朋比媒婁自抵債僂爲
斯文玷亦何賴焉說者謂至此猶未忘情於歷城也

閣學記云予觀直所撰瑣綴錄力詆吳與弼之爲人及諸勝已
者悉加媒孽心竊疑之旣而讀國史狀直之心如其所撰者不
爽也

徐溥字時用直隸常州府宜興縣人景泰甲戌進士及第第二
名授編修天順元年丁丑兼司經局校書侍 東宮講讀成化
紀元遷左庶子兼侍講充經筵講官兼纂修 英宗實錄五年

陞翰林院學士十年甲午陞少詹事兼侍講學士十一年乙未
主考禮部會試十六年庚子陞太常寺卿兼學士十七年辛丑
再典會試陞禮部左侍郎二十二年丙午改吏部二十三年丁
未 孝宗登極簡入 內閣陞禮部尚書兼文淵閣大學士總
裁 憲宗實錄同知經筵弘治三年庚戌復典會試四年辛亥
加太子太傅戶部尚書武英殿大學士時岷藩訐奏知州劉遜
詔逮繫言官救之俱下獄羣議洵洵溥方救之七年甲寅加少
傅兼太子太傅吏部尚書謹身殿大學士進光祿大夫柱國乙
卯命撰三清樂章溥率同官上言天子祭天地夫至尊無對故
禮以少爲貴祭不過南郊時不過孟春牲不過特牛漢祀五帝

儒者非之況三清乃邪妄之說謂一天之上有三大帝乃以李
聃居其一是謂人鬼列於天神非理也至於郊祀樂章皇祖
舊製今所傳樂章雖載永樂大典是書傳采弗精不可以黷禮
臣等誦習儒書若邪說俚曲尤所不習且初設文淵閣命學士
居之者實欲其講議政事講論經史培養本源弼正闕失非欲
其阿諛順旨以取容悅也疏上上卽從之丁巳總裁會典以
疾辭十一年戊午武宗出閣加少師兼太子太師華蓋殿大
學士在位以寬大稱但持守欠廉當時品曰金編修金編修金蓋
金不足珍尚古玩也其他壞典可知尋以目眚乞休卒年七十
二特進左柱國太師謚文靖

守溪長語云徐溥在內閣承劉吉恣威福報私怨之後溥一以
安靖誠信中外咸寧海內和平行政不必出於已惟其是用
人不必由於已惟其賢時稱其休休有大臣之度溥常希范仲淹
置義田以贍宗族其子不肖多奪鄉人之田以充之溥沒未久
爭訟者紛然

治世餘聞云丙辰進士未開選時忽傳要選一十一人同舊進
士一人分撥五府錦衣衛修書人皆不測其由復訪知乃一上
科進士以養病應外選欲求內補百謀未遂聞徐首相溥好古
貨可通其人素雄於貲乃購古琴古畫并珍品投之首相遂誨
乃與太宰屠公瀟謀今各衙門纂修會典緣府衛皆武職恐采

輯不備不若於在部聽選進士內擇其有文學者分撥前項衙門俟書成皆准受京職屠以爲然初進士登科不樂外選多幹公差或養病因回以爲後圖至庚戌以後執政建議除丁憂外凡養病公差回或外選皆以下手一人爲主其人下手實在外選者故謀如此可謂巧宦者矣後得授禮部主事屢經彈劾固不足深論但宰相如此可謂亦將焉用彼相者也

殿學記云予觀李文正公年譜見弘治間所上章疏皆出其手而溥能用之及讀國史稱溥立朝四十餘年因事納約隨才器使屢遇大獄保全善類從容委曲溫易寬裕乃知曹參丙吉雖不踰於陳平魏相而培養國家元氣又不在彼而在此也十八

年之治固有由哉

劉健字希賢河南河南府洛陽縣人父任華州教諭時母張夫人夢一偉人致上帝命持紫玉帶賜其家驚而寤猶有見也時白夫人有身比寤則報生男生而頭骨隆隆起相貌奇甚教諭公大異之性聰慧又絕嗜學自幼所與遊皆洛陽老生知名者於是洛陽人長幼無不知名也景泰癸酉舉鄉試天順庚辰登進士改庶吉士尋授翰林編修成化甲午進修撰丙申陞春坊右諭德丁酉進左庶子丙午陞詹事府少詹事凡三任皆職輔導皇太子二十三年丁未孝宗錄輔導功陞禮部右侍郎兼翰林院學士入內閣叅預機務賜胡騎夷奴戊申改元弘

治 上始御經筵初知經筵事辛亥進禮部尚書文淵閣大學

士甲寅加太子太保賜麒麟服進武英殿戊午加光祿大夫柱

國少傅兼太子太傅戶部尚書謹身殿大學士庚申健率同官

上言曰自古願治之君必早朝晏罷日省萬幾 祖宗視朝在

黎明以前每日奏事二次邇者視朝太遲散本或至昏黑四夷

朝貢奚示觀瞻庶府文移多致擾閤矧今各邊啓釁四方旃災

尤爲可慮怠荒是戒勵精是圖庶可以回天意慰人心也 上

嘉納辛酉健率同官上言近有旨中官往武當山設像掛幡修

舉齋醮命臣等撰勅并祝文茲山宮觀像設已極壯麗若復差

官實爲無益矧今災異迭出生民困苦苗賊肆亂軍旅方興糧

餉供餽猶恐不及君門萬里豈能悉知宜斥邪妄以遏無良報
罷癸亥加少師兼太子太師吏部尚書華蓋殿大學士甲子健
率同官上言近有旨欲於朝陽門外修建壽塔臣等竊惟人主
信佛莫梁武帝爲甚卒餓死臺城信老莫宋徽宗爲甚卒困斃
虜地本以求福反以致禍觀諸往事可爲明鑒我 祖宗相傳
以治天下者堯舜周孔之道而已似此異端蠹財惑衆何關於
治欲造佛塔非所以訓天下垂後世也又令撰真人杜永祺等
誥命及封號臣等竊惟異端不可信誥命朝廷所以獎貞勵能
雖卿士大臣必待秩滿考最乃得頒給况 祖宗廟號不過十
六字親王及文武大臣有功德者謚號止一二字此輩何賢何

能封號多十八字流布朝野傳聞後世皆曰此朝廷所給與儒臣所擬撰也天下後世其謂之何俱報罷蓋自戊午以來

孝廟之御極十餘年矣益明習機務勵精治平而健亦身任天下無所私凡進用大臣及政事臧否必反覆密喻侃侃竭忠愫而上亦推心委用未嘗不嘉納也時又引李謝二公同輔政上數御文華殿及平臺召健等奏對至則屏左右左右莫得聞時竊從屏隙中觀但聞上數數稱善上性至孝雖望治切甚而守憲承法不變易尤惡慘覈健等善將順德意每議及政令及積弊興革必却顧遠謀省機而發使天下隱然受其福上又時語及官府欲創抑近侍權復太祖舊然未暇輕動也乙丑

上寢病有頃等至次內進御榻前執手歔歔令太子侍立具言
軍國重事命健等匡輔健等皆泣受命莫能仰視事具載秘史
中外大弗詳也武宗卽位改元健以顧命大臣翼新政承
先帝之後舉故事勸上耕籍田幸太學冊大婚御經筵惠天下
百度振肅海內晏然屬逆瑾竊柄奸黨盤據國政日就廢健率
同官自劾上奏曰臣等俱以愚庸遭遇先帝簡任內閣委以
腹心臨終顧命惓惓以陛下爲托臣等痛心刻骨誓以
死報及當初政竭力主持未敢輕易求退近者地動天鳴五星
凌犯星斗晝見白虹貫日羣災疊異併在一時京城道路白日
殺人西北諸邊胡虜猖獗損軍折將前後相仍戰則無兵守則

無食民生窮苦府庫空虚風俗傾頽紀綱廢弛賞不當功罰不當罪法令不行名器冗濫諸司弊政日益月增百孔千瘡隨補隨漏當此之際內外臣僚協心倍力猶恐弗堪方且持祿固寵任情作弊讒謗公行奸邪得計變亂黑白顛倒是非人怨於下而不知天變於上而不畏竊嘗歷觀載籍徧閱古今未有如此而不亂者也恭惟卽位之初 詔書一下天下延頸想望太平而朝令夕改迄無寧日百官庶府倣倣成風非惟廢格不行抑且變易殆盡建言者以爲多言幹事者以爲生事累章執奏則謂之再擾沓革舊弊則謂之紛更憂在於民生國計則若罔聞知事涉於近幸貴戚則牢不可破以一二人之私恩壞百年之

定制而不顧以一二人之邪說破滿朝之公論而不恤臣等叨
居重地徒擁虛銜或 旨從中出略不預聞或有所擬議徑行
改易似此之類不能一一備舉臣等心知不可義所當言累有
論列多不見 允比爲兵戶等部議處鹽法功次等事具本上
陳極言利害拱候數日未蒙 批答若以臣等言是則宜俯
賜施行臣等言非則亦明加斥責而乃留中不報視之若無使臣
等趨向不明進退無據深憂極慮寢食弗寧亦知內告外順人
臣之常但政出多門咎歸臣等捫心反顧無以自明展轉於衷
事非獲已嘗聞宋儒朱熹有曰一日立乎其位則思一日業乎
其官一日不得乎其官則不敢一日立乎其位今勢窮理極已

至於斯若諉顧命之名而不盡輔導之實因循玩愒竊祿苟容既負先帝又負陛下不但取譏當時亦將貽誚方來用是共瀝愚誠上塵天聽伏乞聖明矜察特允退休別選賢能代茲重任少逭分毫之罪幸延犬馬之齡則陛下優待舊臣之心勵精新政之義兩盡而無遺矣不報健又率同官上奏臣等竊聞委質事君者人臣之常職託孤寄命者天下之重任必處常而不失其身任重而不負其託然後可居之無愧若徒曠官尸位而假委質之名不能扶顛持危而冒託孤之寄斷乎其不可也痛惟孝宗皇帝大漸之時召臣等至乾清宮御榻前面賜顧命諄諄數百言臣等頓首拜受不勝嗚咽彼時司

禮監太監陳寬等竇近聞之伏自陛下嗣位之初臣等輔導
啓沃多見施行少伸報稱近數月來往往旨從中出略不預
聞有所議擬徑自改易詔書不信政令失中臣等叨冒寵
榮憂慚無地今不敢縷數姑以其重者言之商人譚景清等附
托皇親奏計殘鹽既不肯奉詔還官又不肯領回原價挾
制朝廷搖撼官府沮陛下之美政累母后之盛德論其
情罪死有餘辜且皇親之家既已辭退家人引自此商人者
已不相干而乃曲爲庇護寧使帑藏空虛邊餉匱乏而不之顧
此政令之失一也大同隨征所開衝鋒破敵三次當先二項揆
之舊制俱不該陞況紀功官原開按伏不係對陣侍郎等官勘

得功無顯跡查無明証名字不對多寡不一而乃查近年獎政
欲陞數百冗員以官法爲人情視爵祿如糞土此政令之失二
也 內府冗員奉 旨裁節僉書守門及分守守備等官減革
者百無一二而南海子淨身人又選入千餘非惟傷財害民抑
且敗壞風俗至於蟒龍玉帶濫賞無算大壞名器尤不可言此
政令之失三也御用監書篆缺人吏部奉 旨考選乃令革退
人役通送本監考校優劣是不信銓衡之任而信寵幸之臣况
該部查出革退之人俱係實緣轉陞奉 詔裁革纔不幾時遽
開此例則匠官術士倣倣成風以邪路爲當行視 詔書爲故
紙此政令之失四也他如 皇莊田土已令巡按官查數又復

新官到任取者未回差者繼出帶領人役騷擾地方勢所必有
京師小民貧困已極何以堪之此政令之失五也 駕帖出外
拿人屢經各衙門論奏恐生詐僞近因 皇親家人奏懇畿民
侵占田土祇憑一面之辭輒爲出給提解來京鎮撫司打問情
節俱與原奏不同未免仍解本處官司問理株連負累破家蕩
產冤苦之聲致傷和氣此政令之失六也 韋興齊玄蠱惑 先
朝盜空府庫罪大惡極一則賣緣分守屢劾不退一則奉請追
究止令取回遷延至今未正刑典此政令之失七也 各營執事
官軍及 內府軍匠各倉庫斗俱經奏 准查赴團營及各衙
門乞留仍復照舊廢營伍之籍供私門之用此政令之失八也

內庫承運庫銀兩支銷累數百萬 內庫支用不給印票該庫內
官自請查算竟爾不行司鑰庫銅錢該部屢奏支用展轉遷延
至今未發此政令之失九也饒州磁器奉 詔蠲二年又令起
運來用此政令之失十也似此之類未易悉舉臣等或傳聞坐
視無可奈何或封還執奏不能終止其爲失職實所難辭退思
先帝臨終顧命之言仰念 陛下委任舊人之意若涓埃之力少
有所裨犬馬有知猶當報德况 主少國疑四方多事豈忍潔
身去位自求便安但忠不足以格 君才不足以濟世智窮力
竭日甚於前頃者臣等所陳奉有 聖諭朕便處治至今事
未行今奉 聖諭云待斟酌行事必言無可採又使之仍

導亦不過仍前失職而已 先帝赫赫之靈臨之在上豈欲以
其冒輔導之虛名而蹈曠廢之實咎於此哉臣等再三籌度夙
夜靡寧陳力就列不能者止聞之古人亦有明訓與其身自壞
之不若讓之能者用是備瀝愚衷再申前請乞 聖明俯垂洞
察 諒臣等爲 國之心非由矯飾正臣等失職之罪特 賜
罷歸亟選非常之才俾任難爲之事庶可以上回 天變下慰
民心承 先帝付託之隆保 祖宗根業之重矣疏上 上付
各該衙門查奏革之未幾戶部尚書韓文首倡九卿共劾劉瑾
太監王岳范亨徐智內應健等亦助之焦芳媚瑾以健不附已
遂力攻之又希求入內閣反爲內地致 上震怒傳旨捕岳等

繫獄令劉瑾入司禮監勢傾中外瑾等先嘗奏內閣專主大事
納賄行私及言文官欺壓內官軍職之事形於劇戲上久信之
至是遂令劉健與謝遷自陳准致仕惟卒東陽獨留不出又榜
示天下指爲朋黨矯詔奪其官謫罰米復遂謝遷子丕而言者
悚息受禍矣久之瑾誅復原官還所罰米 上數狩邊又幸江
南健每聞必嘆息不飲食曰嗟乎使 帝暴衣露蓋自苦如此
而吾安處家食吾死無以見 先帝矣輒又憶弘治時事復不
語淚潛潛下也 今上嗣位改元詢謀遺老欲召用而健年已
九十不可強起乃 降詔存問明年遣撫臣就其第致束帛餽
羊上尊酒成化年健嘗掌 制勅比又修 兩朝實錄成又續

通鑑綱目總裁會典皆直質宏雅無溢詞又嘗主文試所第皆海內名士卽不第者不怨也教子務依儉嗇忠厚鄉里信而化之無間言賦性剛正理學深邃以伊洛爲宗任天下大事未嘗迂曲翊運三朝夷險一節終輔孝宗位冠羣臣天下想望風采卽所建立聲施後世至今雖深山窮谷語及弘治時事未嘗不太息殞涕也卒年九十四贈太師謚文靖太史氏曰國朝監前代壅蔽之禍罷宰相官事歸六曹權在人主迨文皇帝時肇設內閣立大學士與天子議機務可否稍稍有權矣然官不過五品比後乃至三孤領尚書職猶不得專制外事嗚呼慮深遠矣然自設立內閣以來稱賢相者前有二楊公

宣宗皇帝垂拱承弼同心君逸臣勞庶幾代天之吏弘治間 帝
卽位既久勵精思治登庸俊賢內則文靖暨李謝二公叅議
朝政外則鈞陽華容洪洞浮梁諸公戮力陳列君明臣良此萬世
一時也迨 敬皇帝遽崩 武廟卽位逆瑾以黠悍竊政構去
公等又罷諸大臣朝政反覆盡矣比其時內閣 顧命元老猶
知敬畏其誅瑾時卽人不私報瑾 上不聞交構言無先疑又
重違公等必誅瑾瑾誅公等未必去守法順流承 先帝之後
上雖好遊豫於政無損也此豈非天哉此豈非天哉或者謂公受
先帝命當以身殉國乃卽引身去爲公歉嗟乎蕭望之固漢元臣
且帝傳也計去恭顯竟誣望之下獄死其於漢事何如哉卽使

公不歸復抗節不諛瑾公必罹禍卽罹禍於瑾無後也徒重壞國體耳公旣諍不從義惟有去卽去後亦落職公益熟慮之矣嗚呼文靖始終之義備矣哉

雙溪雜記云劉健在內閣時河南則有馬文升許進劉宇焦芳李燧健雖同鄉而不阿比文升在兵部每以軍職官不堪委任欲添設兵備按察司官監之健屢止之票旨不准後因奏設九江兵備兵科都給事中夏祚論之令文升回話認罪許進爲戶部侍郎同平江伯陳銳統師出宣大禦虜畏怯嬰城自守無功罷進職致仕焦芳爲吏部侍郎建言禦虜四事健票旨云這本所言窒礙難行芳以爲愧李燧爲鴻臚寺少卿年深止轉太僕

寺少卿又何景明年少能詩人以爲首相同鄉必選入翰林無疑健曰此子福薄能詩何用不取後景明除中書舍人官至提學副使不壽卒自來居內閣不黨故舊僅見健一人

又云河南洛陽劉健自官翰林潛心理學不事華藻立心亦端正自徐溥去後專代言之任以公平爲主絕無言議李東陽同時在閣以詩文氣節援引名流私植朋黨健處之若不知誠可爲君子人矣

殿學記云弘治間予從先大夫遊京邸旣聞梅菴劉公當國正色率下凡諸僚案謁私宅者不與交一言及入朝事關大義累幾千言不輟及予登甲科列史館公尚無恙卒無一言干求恩

遇豈古人所謂大臣與

大學士楊一清云公之學根極理性以伊洛爲師書非正不讀發爲文章務闡明義理羽翼風教刊落華藻而悉歸於純厚作舉業亦以理爲主不逐時好門生受業多知近裏其主考鄉試同考會試廷試讀卷皆以爲的故所得多名士

又云國朝名臣得謚文靖者尚書蕭山魏公驥年九十八顧未得柄用不甚顯少師宜興徐公溥顯矣壽纔七十二耳公位極人臣壽至九十四功成身退完名以歸其鄉者二十年有奇謂爲古今之僅見者非邪

近峯聞略云公罷政歸西涯李公祖餞噓吁泣下公厲聲曰何

用今日哭爲使當日出一語則與我輩同去耳

丘濬字仲深廣東瓊州府瓊山縣人少孤力學天資過人六歲能詩弱冠著論謂許文正公仕元無能改於其俗又不得行已之道不仕可也耆儒碩師見其論初甚駭之已而又深服以爲先儒未有言及此者正統甲子舉於鄉爲廣東鄉試第一名兩試禮部名在乙榜當授教職辭卒業太學祭酒蕭鎡深器重之爲之延譽繇是名益重景泰甲戌復試於禮部名在前列廷試爲第二甲第一名及選庶吉士凡十八人濬居前命讀書秘閣七年授翰林院編修自六經諸史九流箋疏之書古今詞人之詩文亦在醫卜老釋之說靡不深究發之文章雄渾壯麗四方

求者皆至碑銘誌序記詞賦之作流布遠邇然非其人雖以厚幣請之不與天順七年兩廣用兵經年不決濬條列事宜李文達公賢一見卽代上之英宗嘉嘆付所司舉行八年憲宗登極充經筵講官成化元年陞侍講命與修英廟實錄或謂少保于謙之死當著其不軌之迹濬曰已已之變微于公天下不知何如武臣挾私怨誣其不軌是豈可信哉衆以爲然功過皆從實書之三年實錄成進侍講學士五年丁母憂九年服闋復原職十三年續修宋元綱目成陞翰林院學士濬自出已見撰史略謂朱子綱目以正統爲主然秦隋之末有不可遽奪漢唐之初有不可遽予者乃作世史正綱以著世變之升降明

正統之偏全有裨世教本年會祭酒缺僉謂非濬不可乃陞祭酒十六年加禮部右侍郎仍掌國子監事復謂西山真氏大學衍義有資治道而於治國平天下之事缺焉乃采經傳子史有及於治國平天下者附以已見作大學衍義補值 孝宗嗣位之初其書適成乃表上之上覽之甚嘉批答有曰卿所纂書考據精詳論述該博有裨政治朕甚嘉之賜白金二十兩紵絲二表裏陞禮部尚書掌詹事府事且命錄其副付書坊刊行修憲廟實錄充副總裁官弘治四年實錄成加太子太保本年冬兼文淵閣大學士入內閣在位務以寬大啓 上心忠厚變士習凡人才進退政事廢舉一惟 祖宗舊典是循五年天變上疏

萬餘言大槩論上改元之初歲在戊申與洪武初元同符宜釐革庶政盡復舊規因擬二十二事陳時政之弊其略曰成化間彗星三見遍掃三垣地震無慮五六百次邇者彗見天津地震天鳴無虛日且異鳥三鳴於禁中考諸經史天變莫大於彗孛在三垣三台尤爲重地變莫大於震動在京師邊防尤爲危急矧禽鳥動物得氣之先春秋一百四十二年書彗孛者三地震者五飛禽者二今乃屢見於二十五六年之間變不虛生必有其應天人相與其可畏也臣願體上天仁愛念祖宗基業端身以立本清心以應務謹好尚勿流於異端節財費勿至於耗國公任用勿失於偏聽禁私謁以肅內政明義理以絕邪奸

慎儉德以懷永圖勤政務以弘至治庶可以回天災消物異帝王之治可幾也疏凡十餘萬言上命諸司議行又請訪求遺書上皆嘉納洪武永樂以來凡百司朝覲命吏部都察院考其尤不職者乃黜之不過數十人其後東部患人言務以多黜爲公方岳以下少有微瑕輒黜之黜者亦不敢訴濬深知其弊言於上曰唐虞三載考績一考黜陟今有居官未半載而黜者所黜徒信人言未必皆實此非濬虞之法亦非祖宗舊制也上深然之會吏部上大小庶官當黜者幾二千人乃勅凡歷官未三載者俱復其任雖經一考非有貪暴實跡者亦勿黜蓋用其言也醫者有療疾往來其家者以失職怨家宰王公

恕奏訐其短衆疑奏出濬意科道以爲言 上察其誣待濬益厚七年加少保兼太子太保改戶部尚書武英殿大學士以目疾辭不允八年卒於官贈太傅特進光祿大夫左柱國謚文莊官其孫管爲尚寶司司丞濬性剛直與大臣論政議所未安必反覆辯論言官論事亦以是非詰之不肯媿姁取悅無歲不求歸前後凡十三疏 上皆不允問勞賜賚之使踵相接於門初經生文士以奇怪相高或不可句濬考南京鄉試及禮部會試凡怪辭險語皆痛斥之怨誹不恤也及爲祭酒尤諄諄爲學者言之文體乃復渾厚士有慕道德者或過爲詭異之行以徼名濬因考會試發策言之士乃知道以中庸爲至詭異不足貴也

其在太學論者謂師道尊嚴無愧李文忠公綜理微密則文忠公不及嘗謂朱子家禮最得崇本敦實之意然儀節略焉爲考諸儒所言作家禮儀節使好禮者可舉而行朱子微言散見於傳註語錄學者率未易求乃采其精切者彙爲二十篇倣魯語作朱子學的其他著述甚富世稱博學爲我朝之冠云

程敏政敘其集曰先生懼學者之無本也有學的之編懼學者之不知變也有史綱之作懼學者之明體而不適於用也有大學行義之補其言鑿鑿可行行之可以興治致吾君於堯舜使吾道不爲空言益其志如此

蔡清曰先生博極羣書如巨海之吞吐百川含弘無際矣其才

華國名世者四十年晚際聖明登之台輔取其所著書於大內以廣聰明權衡百度矣其道尊爲國師門生學子遍天下矣自瓊以來所鍾人物未有如先生於乎其不爲虛生也已

守溪長語云丘濬閣老於子史無所不聞而尤熟於國家典故議論高奇人所共賢必矯以爲非人所共否必矯以爲是能以辯博濟其說亦自恃其才故對人語滾滾不休人無敢難者其論秦檜曰宋家至是亦不得不與和南宋再造檜之力也論范文正則以爲生事論岳飛則以爲亦未必能恢復其最得者黜元不與正統許衡不當仕於元亦前人所未發也性好著述雖老手不釋書性剛褊不苟取亦恬於仕進年七十猶滯於學

士 孝宗卽位乃進大學衍義補得進尚書李廣幸於 上因
之得入內閣與同僚爭每事欲有紛更時王恕有重望於天下
濟每憎之會劉文泰劾恕或以爲濟嫉之也以是尤爲衆所貶
理學名臣錄云公穎悟絕人私淑於趙考古無書不讀其爲已
之學見於朱子學的經濟之學見於太學衍義補至世史正綱
以明正統大義家禮儀節以持世教大端 國朝大臣律已之
嚴理學之博著述之富無出其右者乃不得預名臣之列議者
惟以與三原王公晚年相軋爲媚嫉計聞始於內宴坐列丘以
內閣王以冢宰各執已意致隙適御醫劉文泰援例求進事下
吏部議格因嫌王公疏摭其短以丘密授風旨王亦尋致仕

去而言者譁然指其悼亡長思錄戲劇五倫記此直陶靖節之閒情賦寓情文墨耳宋洛蜀黨禍亦自戲謔之一言夫以東坡固失矣伊川豈盡爲得乎則二公是非判然矣

殿學記云國朝洪武建文間時則有若劉伯溫之閎大宋景濂之浩博王子充之醇正方孝孺之爾雅永樂宣德間時則有若解大紳之雄放胡光大之豪宕楊文貞之精密金文靖之沉渾正統景泰間時則有若李文忠之朴茂劉文安之該覈然皆麗藻豐腴未有若丘文莊之明體適用酌古準今裒然爲一代文宗也自是以後若程篁墩李文正諸公蓋聞文莊之風而興起焉者或乃以劉文泰之誣而病之於乎豈知文莊者哉